

Taitus

Paul letawa me nola sowa Taitus mampe girumalena

¹ Ne Paul ipa God nolawa dewalala ita Iesu Keriso aposeliwa dea. Me ne waaubanena, God apanawa mida me sonabamona waeuwamopino Iesu Keriso bedewe sumanaintompe ita ulaipaida intawa no sumanaimba waeuwa wadia rua atentompaa baiwa. ² **No sumanaimba ita ulaipa intawa bumpa, sa ipa no inawinakasala bedewe insaisamba ituite wainitana. God, me mida mai laga wawala, tawo segasia walamawe inawinakasala ema sauawa wan.** ³ **Tane tauma me walama ituna bedewe God dewa ema uduudu me Gagalowa euda bedewe sabamosan.** Benema ema ipa God no Inawamba ne witanawosane ita dianena rua wasabamosadina. ⁴ ✧Taitus, ne otonaida, e no do uduudu sumanaimba dea bedewe wainitana manawo leta ema girumantedina.

No Mamamba God ita no Inawamba Keriso Iesu saubu amonawa euwa ita do wanwan euda obasa eneempa! Niapo!

Ekelesia onionalala nolau

⁵ Sona Taitus, ne e bonabona Kirit bedewe eena nola isiwa bauta mai dewamopatuwaponna e dodomanamoe teadewasamoa baiwa. Bauta dieena rua e bola debamau deadea bedeuwo

✧ **1:4:** 2 Korint 8.23; Galasia 2.3; 2 Timoti 4.10

েকেlesia onioniau apanawa enitumowo nolantompā. ⁶ ✧Tane ekelesia onionalala apanawa bedewe mai wawu da winepi, dia. Me manainapa dea os nata deaitopa waimompa. Ita do me obampa sumanailala, tane mai asipotalala ba dewa kadiwa rebareba dewamompo apana mo umanau kadiwa wampa. ⁷ Ne epe wadina, ipawa apana mida ekelesia oniamompaa nolawa God wanena, me mai kadi dewasampa apana me wawusampa, dia. Me mai meba ituposilempe sumanai sosowa aiawa badowa mampe diamompa. Do mai tauwadea nuawa kadilempa, mai kaino esa badowa nampa, mai onadewalempa ita mai anaanata dewawa dewasampa, dia. ⁸ Tane me ideita sosowa da nuaeuwa mampe banlamompo duwe odompa. Me dewa eubu dewawa nuawadawadasampa, do insaisawa aiaisiwa euda os waimpa. Me dewa uduudu bedewe dodomana os dewasampa, kakaiwaida waimpa, ita do meba onioniadewalempa. ⁹ Do me Gagalo euda sumanaiwalala, no sumanaimba waeuwa wadia rua, wadompaitue bedewe badowa enompa. Inta ema bedewe me rua os sumanai waeuwa dodomana mampe sosowa wasaumompa. Ita do apana mida ulaipa gagalowa amboitusaia dodomanompa.

Laga waeuwa apanawa gagalou

¹⁰ Ne ema epe wadina, ipawa apana uaraia asipotalala ita gagalo warebasalala lagawaau waimoi. Mo bedeuwo apana isiwa mida Iuswa ete nonowa dewawa waeuwantoia, mo ipa

✧ **1:6:** 1 Timoti 3.2-7

sa kadiuida waimoi. ¹¹ Apana sa e ideita anaanamowo dewa sa epu, ipawa mo waeuwau lagawaa mai waeuwantoipona mampe gagalontoie du deadea apanawa wanwambu rebarebasai. Mo epe dewantoia, sa ipa dewa malawalaida mane wadawada insaisawantoie lai. ¹² Kirit apanawa dea, mo muba souida mida insaisa debama wadena, mo umanau wane wanase, “Kirit apanawa mo ipa lagawaauida, pue kadiu ruau, ita nana narebasantoie etepu saiwa wadio oauarantoie walama di diasai apanawa.”

¹³ Gagalo ema mo umanau wadia ipa ulaipaida. Taitus, mo dewau sa baiwa badowaida anaanamowo epue sumanaibu dodomana euda bedewe wampu. ¹⁴ Do diamowo mai Ius apanawa dudunau ipusiawaia etaetawa menamomp, ita anaana apanaida teamoiena mai insamomp, dia. Ipawa apana mida ulaipa waeuwa adiananasaiena, mo ipa anaana sa teamoiena. ¹⁵ Apana mida dodomana euda os wandia me mampe dewa uduudu eubu os, mai anaanawa da wineipona, dia. Tane apana mai sumanailala ita duba dewawa mo bedeuwo winedia, mo mampo mai dewa euwa da wineipona. Tane mo insaisau ita nuau ipa dubaidalen. ¹⁶ Mo waie waiase, “No God atenten.” Tane mo dewau kadiwa mampe Godida lagawa wai. Mo ipa God ewadabuamona apanawa, God aiawa mai ruawantoipona, ita mai dewa euwa da dewasapua rua, dia.

2

Ekelesia dewawa gagalowa

¹ Tane sona Taitus, e sumanai waeuwa dodomana asiassi waeuwadewaitona. ² **Ekelesia apanawa eiau waeuwamowo mo mai ewanuauntompa ita insaisau euda os waimompa, mo muba onioniadewantompa. Ita do sumanaibu, nuawadawadau ita poka daitada bedewe dodomana os badowa enompa.**

³ Deawaa **ioto tontau** do waeuwamowo kakaiwa euda os waimompa, mai kutun wampa, ba esa badowa wain nanawa nuau wadaidasampa, dia. Tane mo ioto sosou mampo dewa euwa waeuwantompa. ⁴ Inta ema bedewe mo ioto sanaa waeuwamompo mo babadau ita obampu nuawadawadamompa. ⁵ Tane do mo muba onioniadewantompe euda os waimompa, du dewawa uduudu oniadewasamompa, babadau aiau ruawantompo ita mai mida God Galalowa euda wakadisasapi.

⁶ **Apana sanaa** do wasaumowo muba onioniadewantompa. ⁷ E eba dewaa dodomana mampe eueuwa euda dewasano sosoa eweempe ruawantompa. Ita sumanai sosoa isiwa nuua uduudu ita ulaipa os mampe waeuwamona. ⁸ Aia euda dodomana os mampe apana waeuwamona, mai mida e waeuwaa wadabuasapi, dia. Epe dewaitona, e aiaa amboitusaia apanawa malantopue no sumanailala ebomba mai wakadisasapu, dia.

⁹ **Nola dewalala** sumanailala apana debamau baibu nolantoie poka eteia ideita mo debamau aiau ruawantompe ita nola uduudu bedewe mo nuau eusampa. Mo mai debamau aiau baiwa momoduntompa, ¹⁰ ba mo mampo pointompa,

dia. Tane mo ideita dewa uduudu bedewe euwa sabamosampo apana mo sumanaibun-tompa. Inta ema bedewe mo God no Inawamba umanawa waeuwa wadaposisampe sapasampa.

¹¹ Sumanailala ideita epe dewantompa, ipawa God me nuawadawadawa amonawa no inania apana uduudu baibu sabamosan.

¹² God nuawadawadawa amonawa ema no banlanedia god ipusiawaia dewawa ita tawo ewanuauwa emotaa baiwa. Tane no walama emawo insaisamba euda mampe nuba onioni-adewantonte Godida sawantonte dodomanaida wainenta.

¹³ Tane tauma wainitana walamawe no nitu eudida, sa ipa no Godimba debamawaida ita Inawamba Iesu Keriso sapawaida do sabamolepie wise pia bedewe insaisamba itu-ite onioniawaidantite wainitana. **¹⁴ ✧ Me meba etepaida no baimba nanalene en. Ema epe inta no wanwanimba rebareba bedewe malesanene inanene euneno me apanawaida wananten, ita dewa euwa baiwa nuamba uduudu mampe nolantonta.**

¹⁵ Dewa ema girumantena sumanailala waeuwamone ita mukaa uduudu mampe wasaumone badowa anaanamona. Tane mai mida e ituaisiepie aiaa etadabuasapi, dia.

3

Sumanailala intau waeuwa

¹ Taitus, e sosoa sumanailala gagalomoe nuaitumoa mo mida oniamoia ita do gabeman muka wadeiena apanawa aiau etompe ruawantompe

✧ **2:14:** Ekisod 19.5; Diutor 7.6; 1 Pita 2.9

dewa euda dewawa os baiwantompa. ² Do di-
amowo mai mida da wakadisasapu, mai dia-
diantompa, tane sosou do etaetantompe nuau
aiaisiwa mampe apana uduudu do waimompa.
³ Ipawa no do mapo oo rua wainite, God aiawa
mai ruawantepona, ita laga mampe banlakadis-
aneieno ulaipa intawa etana. Do ete nuaeuwa
ita ewanuau daitada taudonene teinaneio ru-
auntite. Tane do dewa kadiwa rebarebaida
dewamoite, nuamba obuleidie, ita apana no
nibuaneio edawa nibuamoite. ⁴⁻⁵ **Tane God
no Inawamba nuaeuwa ita nuawadawadawa
apana baibu sabamosana walamawe kadi
taiwa no taudonedia lotonaubene inanen.**
Me mai no dewamba da dodomana baiwa
inanepona, dia. **Tane me meba no nu-
aparembaidalene kadimba insendabuasan.**
**No inaida muwantena walamawe God Aleupa
kakaiwa mampe nuamba mitene ita wanwan-
imba sanaasana bedewe inanen.** ⁶ **God Iesu
Keriso no Inawamba bedewee Aleu kakaiwa
unu rua no osombosane memenaubeno wa-
datana.** ⁷ **God epe dewasana no me nu-
awadawadawa amonawa euda bedewe me
mampe dodomanantataa baiwa, ita do in-
awinakasala me sauawalena wadata. Inaw-
inakasala sa bedewe no insaisamba ituitana.**
⁸ Aia ema ipa ulaipa ipuipua, bedewe no in-
saisamba itunta. Ne menanedia e dewa ema
uduudu deaitopa waeuwadewasamona, mo mida
God bedewe sumanaintoia insaisau ita nuau
uduudu mampe dewa eubu ideita ruawantompe
dewamompaa baiwa. Nola sa ipa ipuipua eubu
apana baibu.

⁹ Sona Taitus, aia di warebasala, nosinosi

reresa muntona gagalowa, di diadiantompaa ita Moses anaanawa osowe wawantompaa dewawa uduudu sauite emoa. Ipawa dewa sa uduudu ipusiawaia, bedeuwo mai sau da euwa wineipona, dia. ¹⁰ E sawanalawo apana mida ekelesia bedewe empuempu dewawa dewasadia walama nata bedewe dodomanalepia baiwa wasausaa. Tane e aiaa etepie mai ruawalepia eidasaa, mai me nata deaitana, dia. ¹¹ E ateiten apana inainamba sa ipa insaisawa dubaidalen. Ita me dewawa kadiwa mampe meba sabamoleide me ipa mai dodomana dewasaipona, dia.

¹² ✧Ne sona Ateamas ba Tikikas leta ema do wapaubepo e manawo wisepio ewee, tauma eba inta banuidasae tauwadea os ne mainawo Nikopolisiwa winea. Ipawa ne obasa walamawe sape wankasanteapa insaisawantedina. ¹³ ✧Tane do anaana atembaida apanawa Senas ita do Apolos saumowo tauwadea os naepe antoiawo antopu, do ewamoadewaitaa mo mai dima da abolawantopu. ¹⁴ No sumanai sosomba wankoalala diamowo dewa eubu dewawa dewasampe atentompaa, ita noladewantompaa mane wadompaa dewa dainea pokawaaida segalempo sausampaa baiwa itumpa.

¹⁵ Mo mida mape ne do wainitana e auwaei. Sosomba sumanai bedewe nuawadawadaneia do auwamoitana.

God amonawa euwa e manlawo winompaa, niapo!

✧ **3:12:** Aposel 20.4; Epesus 6.21,22; Kolosi 4.7,8; 2 Timoti 4.12

✧ **3:13:** Aposel 18.24; 1 Korint 16.12

Ina Sanaa Gagalowa
The New Testament in the Kanasi Language of Papua
New Guinea
Nupela Testamen long tokples Kanasi long Niugini
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files dated 9 Oct 2020
b27bd40e-e091-5268-bcbf-8232e1d7501a